

## INTERVJU SA DUBRAVKOM LOVRENOVIĆEM

M: Prof. Lovrenović možete li mi reći šta radite, gdje ste zaposleni i koju funkciju imate?

L: Ja sam dakle prof. srednjovjekovne historije odnosno predajem predmet koji nosi naslov opća historija iz srednjeg vijeka, a taj predmet predajem na Filozofskom fakultetu u Sarajevu, a osim toga što sam profesor ja sam član dviju državnih komisija: Komisije za očuvanje nacionalnih spomenika Bosne i Hercegovine utemeljene ugovorom mirovnog sporazuma u Dejtonu kao i član komisije za odnose Bosne i Hercegovine sa UNESCO-om, toliko najkraće o meni.

M: Znači Vi imate veliku funkciju?

L: Pa ja ne bih tako rekao, znate, da ja imam neku posebnu funkciju. Pogotovo se to ne bi moglo reći danas u jednoj zemlji kakva je Bosna i Hercegovina, jer u ovoj zemlji praktički nijedna funkcija rekao bih ne znači približno ono što bi jedna ili slična funkcija značila u jednoj uređenoj zemlji, naime današnja Bosna i Hercegovina daleko je i čini mi se nažalost svakim danom sve dalje od mogućnosti da bude uređena zemlja, obzirna država sa obzirnima institucijama, tako da na tu Vašu opasku mogu odgovoriti jedino na ovaj način.

M: Tu se slažem sa Vama, kao što sam Vam već rekla dogovorili smo se da ćemo imati intervju u vezi piramide u Bosni i Hercegovini - Visoko. Prvo želim da Vas pitam da li ste posjetili arheološke lokacije Bosanske piramide u Visokom?

L: Te lokalitete ja sam posjetio još prije 30 godina kada su od njih takođe predstavljali piramidu što predstavljaju i danas, znači jedno prirodno oblikovano piramidalno uzvišenje.

M: Da li Vi smatrate da ovo možda mogu da budu piramide?

L: Pa jesu piramide, ali ne onakve kakve ih predstavlja Semir Osmanagić i ljudi koje je on angažirao.

M: Da li ste Vi pratili javna izlaganja Egipatskih eksperata, znači egiptolozi: dr. Ibrahim Muhamed Aly, mr. Lamija El-hadidi, geolozi Aly Barakat i Dario Andretta koji su radili na lokaciji Bosanskih piramida u toku 2006. godine?

L: Jesam, pratio sam to i smatram da je to jako neozbiljno.

M: Zbog čega to kažete, ovi su ljudi potvrdili da je riječ o izuzetnom arheološkom nalazištu: Bosanskim piramidama Sunca i Mjeseca i kompleksu podzemnih tunela, kakav komentar imate da date?

L: Pa neki poseban komentar nemam, smatram da je to samo jedan veliki propagandni trik koji nema ničeg zajedničkog niti može imati ničeg zajedničkog koliko sa zdravom pameću toliko sa čvrstim znanstvenim spoznajama koje se tiču tog razdoblja ljudske povijesti.

M: Kada kažete trik na šta mislite, ko pravi trik, kakav trik, o čemu se radi?

L: Ja nisam čovjek koji se bavi tom vrstom istraživanja, dakle ja sam znanstvenik koji se bavi činjenicama i znanstveno provjerenim činjenicama, tako da Vam na to pitanje ne mogu odgovoriti. Bave se dakle ovi ljudi koji su u tome revolvirani dakle na bilo koji način, a koji su njihovi krajnji ciljevi u ovome trenutku je teško suditi.

M: Da li ste upoznati sa, evo čitam ovu vijest što imam, da li ste upoznati sa topografskim analizama Geodetskog Zavoda BiH, koji je potvrdio da tri glavne piramide imaju pravilne orijentacije prema stranama svijeta, a to je karakteristika za gradnju piramida?

L: Upoznat sam sa tim, ali za moje mišljenje o tom fenomenu nema neki presudan značaj.

M: Znači Vi mi sada govorite da Vi mislite da ovo nisu piramide?

L: Jesu piramide, ali koje su oblikovane prirodnim procesima kako to kažu ozbiljni geolozi iz Tuzle sa tamošnjeg fakulteta, koje su oblikovane na taj način milionima godina. Osim toga ako putujete malo više Bosnom i Hercegovinom vidjećete da takvih i sličnih "piramida" imate na desetine i stotine.

M: Da li ste upoznati da je Građevinski institut iz Tuzle radio analize uzoraka sa piramida Sunca i Mjeseca, koji je i potvrdio da su kameni blokovi sa piramide Sunca identični građevinskom betonu najbolje kvalitete i da su ploče pješčara sa piramide Mjeseca najbolji pješčar i da je vezivni materijal na obje piramide identičan, kakav je Vaš komentar?

L: Najprije ću komentirati Vaš nastup, Vaša pitanja, naime kako mogu razumjeti iz Vaših pitanja Vi ovu notornu glupost koja se zove Bosanska piramida shvaćate već dokazanom činjenicom. Ja ću Vas u tom smislu morati razočarati da sva ta medijska prašina i sva ta propagandna mašinerija, koja je upregnuta da bi ljudima dokazala nešto što je nedokazivo, na mene ne ostavlja uistinu nikakav dojam. Istina je da je to jako dobar znak za našu sredinu i istina je da su na tu temu već do sada skovani jako dobri i sočni vicevi od kojih čovjek mora da se smije.

M: Satelitske i termalne analize, da li ste Vi upoznati sa tim što se radilo?

L: Ne pridajem puno značaj glupostima, nakon što sam pročitao knjigu koja nosi naslov "Povijest ljudske gluposti" ja uistinu nastojim što manje da budem opterećen ljudskim glupostima.

M: Znači nema potrebe da Vam spominjem kakve su se analize vršile?

L: Ne, što se mene tiče uistinu nema potrebe jer je cijeli ovaj slučaj zapravo fabriciran i ako imalo razumijete logiku znanosti onda ćete se morati sa mnom složiti. Znanost naime najprije, da bi nešto dokazala mora ponuditi pregršt i obilje dokaza, ovdje je najprije postavljeno sve u obliku teze i onda se počelo tragati za dokazima. Naravno i neupućenim i informiranim ljudima to je znak da se radi o prevari.

M: O kakvoj prevari govorite?

L: Samo da znate, Vi budući da glupost prihvaćate kao vrlo ozbiljnu stvar...

M: Profesore ja sam Vas zvala za intervju za Vaše mišljenje, ja ništa ne prihvaćam ja sam Vas samo nazvala da čujem Vaše mišljenje i zato se nadam da će te mi odgovoriti na ova pitanja koja Vas pitam i to nema veze sa tim šta ja prihvaćam a šta ne. Znači u toku 2006. godine, koliko sam upoznata s tim, oni kažu utrošili su više od 100 000 radnih sati i na iskopavanja i na analize na lokaciji Bosanske doline piramida, imate li ikakav komentar?

L: Ja mislim da ovaj naš razgovor dalje nema smisla, zapravo bio sam u obavezi da komentiram vaša pitanja jer Vi očito ne upotrebljavate uz te epitete piramida Sunca, Mjeseca ne znam...

M: Plješevica, Visočica, kako vi želite da kažete...

L: Mi smo se dogovorili prije razgovora da nećemo prekidati jedno drugo i ja Vas nisam prekidao. Na koncu konca Vi možete naravno postavljati pitanja kakva god želite, to je Vaše pravo, a ono što ću ja odgovoriti na to pitanje, to je moje pravo.

M: Dabome...

L: To je jedan najbolji odnos između noga ko pita i onoga ko odgovara.

M: Tako je, slažem se.

L: Eh sada neke druge odgovore, ja Vam te odgovore na Vašu žalost, ili ne ja to ne znam, ja Vam te odgovore zaista ne mogu ponuditi.

M: Nije nikakva žalost profesore, ja sam Vas nazvala da mi date svoje stručno mišljenje. Da nisam mislila da mi možete dati stručno mišljenje, ja Vas ne bih nikada nazvala.

L: Ja sam Vam to mišljenje rekao i smatram da ovo što sam Vam rekao je vjerovatno dovoljno barem što se mene tiče oko svega toga, bilo bi vjerovatno zanimljivije da neko napravi nešto što bi smo recimo u ovom trenutku mogli nazvati sociopsihološkom analizom te situacije o kojoj se govori "piramidama" danas u BiH, jer je nažalost u ranijem vremenu ova zemlja postala zemlja beznađa, jer je nažalost ova zemlja postala zemlja prevarenih, unesrećenih, da li trajno unesrećenih ljudi, ja to ne znam.

M: Ne zvučite mi pozitivno.

L: Jedan posve neodgovoran i neozbiljan čovjek kakav je Semir Osmanagić i te takve, unesrećenim, bezorijentiranim ljudima, ljudima koji najveći dio svoga života posvećuju borbi za golo preživljavanje, jedan takav prazan projekat koji se zove Bosanska piramida, koja je u međuvremenu postala test Bosanskog patriotizma, to znači ovako, ako ste Vi za piramidu Vi ste dobar Bosanac i Vi ste patriota, a ako niste onda Vam je taj epitet uskraćen.

M: A to baš tako ide?

L: Možete mi vjerovati ili nevjerovati, to je sad do Vas, ja Vam govorim onako kako ja vidim stvari i to jeste upravo tako kako Vam ja sada iznosim.

M: Recimo tvrdimo oboje i ja i Vi da piramide nema. A šta ako ima?

L: Ja sam to rekao gosp. Semiru Osmanagiću prije više od godinu dana u televizijskom nastupu: neka me on zaista uvjeri relevantnim naučnim dokazima koji će biti verificirani i prihvaćeni u najširoj znanstvenoj javnosti. Neka dakle mene uvjeri u istinu tih svojih tvrdnji i ja ću biti prvi i neću gubiti ni jednu jedinu sekundu da odem na prvu televizijsku stanicu i da kažem: ja se izvinjavam gosp. Semiru Osmanagiću, bio je u pravu.

M: Da li biste Vi željeli da se radovi nastave ili da se zaustave?

L: Ta odluka o tome nije u mojim rukama, odluka o tome je u rukama nadležnih institucija, nadležnih ministarstava, odnosno praktički nažalost ta odluka je u rukama političara koji su već do sada obilno zloupotrijebili sve ovo što se događalo oko piramide, koji su posjećivali tu piramidu, koji su se slikali na piramidi, koji su davali i koji daju izjave o tome da je to jedan od najozbiljnijih naučnih projekata u Bosni i Hercegovini. Nažalost odluka o daljim radovima je u njihovim rukama, koliko se može pretpostaviti na osnovu ovih dosadašnjih iskustava, ja vjerujem da Osmanagiću njihova podrška, a između ostalog i finansijska podrška, neće izostati. U međuvremenu kojeg li apsurdna, BiH je jedina valjda zemlja na svijetu koja nema zakona o visokom obrazovanju, mladi ljudi odlaze iz zemlje koja se zove Bosna i Hercegovina, okreću joj naravno leđa i traže rješenje svojih egzistencijalnih problema na drugim stranama dok zemlja ubrzano propada.

M: Pa to ako je tako onda zvuči jako žalosno prof. Lovrenović, čitam po web stranicama bilo je kod nas u Americi na TV-u, gledali smo da imaju takođe kamene kugle vještačkim putem pravljene od granita koje se nikad u prirodi ne javljaju, bar tako kažu, šta Vi mislite o tome?

L: Notorna glupost.

M: I šta ima da kažete za strane stručnjake koji su rekli da su to piramide, šta imate za ove ljude da kažete?

L: Prvo to su po mom sudu neozbiljni ljudi za razliku od ljudi vrlo ozbiljnih poput predsjednika Evropske arheološke asocijacije i drugih ljudi sa referentnim imenima i sa

referentnim djelima koji su takođe davali svoje sudove i svoja mišljenja o tim navodnim takozvanim piramidama.

M: Znači ovo je sve velika prevara i zavara?

L: To je tako sada u ovome trenutku, tako je to krenulo i ja moram samo da žalim što Vi i ja nismo imali priliku da razgovaramo u nekom kafiću u Sarajevu i što Vi zapravo uzaludno trošite telefon razgovarajući na ovaj način s mnom.

M: Ne brinite za moj telefon, zovem preko kompjutera i jako mi je jeftino, ja ću na ljeto doći u Bosnu i možda se vidimo.

L: Ja Vas u svakom slučaju vrlo rado očekujem pa se onda možemo zajednički smijati, iako je naša situacija u Bosni daleko od smijeha, ali mi Bosanci smo poznati kao ljudi koje krasi jedna odlika, a to je da proizvodimo dobar humor, tako da ću Vam ja kada dođete u Bosnu ispričati puno, puno dobrih viceva na račun naših piramida.

M: Dobro, da Vas pitam nešto, ovo Vam moram priznati pročitala sam negdje da ste rekli na javnoj TV stanici da će te da se živi zapalite na vrhu piramide ako ovo bude piramida, da li je to istina?

L: To nije istina i vrlo Vam je jednostavno to provjeriti, tražite snimak emisije koja je bila na FTV koju vodi gosp. Bakir Hadžiomerović, to je izmišljotina ljudi koji su zapravo mojom javnom izjavom, kojom sam sve to dezolvirao kao glupost, ljude je uhvatila panika, naravna stvar ja to potpuno razumijem jer su svjesni prevare koju rade i očito da njima svaka suprotna reakcija ne odgovara, tako da je onda u međuvremenu napravljena ta tako reći priča koja naravno sa stvarnošću nema veze.

M: Znači Vi onda ovu izjavu niste nikada rekli?

L: Ne takvu izjavu nisam rekao, ali dao sam nešto slično.

M: Kakvu ste izjavu dali?

L: Ja sam sa jednim svojim prijateljem koji je arheolog pričao o tome, a onda je on mene u šali pitao, a šta ako tamo zaista jeste piramida, šta ćemo onda, a onda sam ja njemu rekao, e onda nam preostaje samo da se spalimo.

M: Dobro imate još išta da kažete?

L: Pa teško je govoriti o glupostima inače, a pogotovo danas u Bosni, Vi uistinu ne možete zamisliti živjeti sigurno u normalnim životnim okolnostima, Vi ne možete zamisliti dubinu tragedije ove zemlje i to ne možete zamisliti i to je dobro što ne možete zamisliti, nama koji živimo ovdje i kojima je stalo do ove zemlje, nama koji živimo ovdje i koji vjerujemo u budućnost ove zemlje, ja živim ovdje i gradim budućnost za svoju djecu, još uvijek dakle vjerujem da ova zemlja ima budućnost, dakle nama u ovakvim okolnostima kada se serviraju priče poput piramide, morate shvatiti da se u ljudima javlja posebna osjetljivost na takve stvari, pogotovo recimo kada vidite kako političari zloupotrebljavaju tu priču i kada vidite da u ovoj zemlji kao što sam rekao političari neće da donesu zakon o visokom obrazovanju, kada vidite da se znanstveni radnici u ovoj zemlji ne stimuliraju i kada mladi ljudi odlaze iz ove zemlje u takvim okolnostima, a gdje su tek invalidi, gdje su unesrećeni ljudi, gdje su mrtvi ljudi, sve to je zapravo zbog svega toga i ljudi poput Semira Osmanagića prave jednu takvu grešku i davati bilo kakav komentar na sve to osim ovoga što sam rekao izgleda mi zapravo suviše, jer zapravo riječi nisu dovoljne da objasne sve ovo o čemu sam Vam ja govorio.

M: Dobro, znači nema nikakve potrebe da Vas pitam više pitanja ni o kamenim kuglama ni o podzemnim tunelima, o ikakvim istraživanjima. Vi tvrdite da ovo nisu piramide ljudskom rukom pravljene?

L: Ne kažem to samo ja to su rekli svjetski priznati stručnjaci a ja im se u toj ocjeni pridružujem.

M: Ali Vi im se pridružujete, ali bilo je geologa, arheologa, egiptologa iz Egipta koji su potvrdili da je nešto ljudskom rukom pravljeno?

L: Da ne bude zabune, na tom uzvišenju pored Visokog nalazio se i Srednjovjekovni grad Visoki i sigurno je da na tom uzvišenju postoji kontinuitet ljudskog življenja star više hiljada godina, dakle nije nemoguće na tom cijelom području toga cijelog brda naći neki artefakt koji je pravljen ljudskom rukom, to nije sporno ali na osnovu toga tvrditi da je to piramida koja pripada nekoj drevnoj civilizaciji to zaista jeste glupost i ništa više od toga.

M: Šta još mogu da Vas pitam, znači niste bili na ovim lokacijama uopšte otkako se počelo kopati?

L: Bio sam u dva navrata.

M: Gdje ste bili, šta ste vidjeli?

L: Bio sam na ovom uzvišenju gdje se nalazio nekada Srednjovjekovni grad Visoki i ono što sam vidio tamo to me je dodatno uvjerilo u ono što sam o tome mislio prije nego što sam tamo otišao.

M: Da li ste bili prošle godine, znači 2006. godine, da li ste bili na ovim lokacijama?

L: Jesam, bio sam.

M: U kojem mjesecu?

L: To je bio mjesec juni.

M: Pa i ja sam isto bila prošle godine tamo i vidjela sam neke ploče koje su jako lijepo isječene kao keramika i poslagane lijepo, ja nisam ni arheolog ni geolog kao što sam rekla ali ploče zaista za nestručno oko izgledaju kao ljudskom rukom rađene, šta ako jesu ljudskom rukom rađene?

L: To sam Vam maloprije objasnio o čemu se tu radi, to je područje na kojem je kontinuitet ljudskog života prisutan više hiljada godina i sa tim je vjerovatno, zašto da ne, da se na takvom području nađu artefakti koji su pravljeni ljudskom rukom, međutim to nema nikakve veze sa ovom pseudoznanstvenom teorijom o navodnim piramidama te stvari morate razlikovati i to je zapravo jedan od najboljih pokazatelja koji se vide kako ovi opštenari varaju neupućeni svijet.

M: Razumijem, Vi radite, koliko sam pročitala na internetu, u komisiji za očuvanje spomenika, da li je to istina?

L: To sam Vam rekao na samom početku našeg razgovora da sam ja član komisije za očuvanje nacionalnih spomenika.

M: Samo želim da potvrdim. Da li Vi imate autoritet da dozvolite dalje radove na piramidi Sunca?

L: Institucija u kojoj ja radim nema nažalost taj autoritet jer je Bosna i Hercegovina kao država napravljena tako da zapravo nema državne institucije sa jakim autoritetom, sa jakim snagom.

M: A da imate taj autoritet da li biste to zabranili?

L: Ja to najprije ne bih odobrio na način kako su to odobrile institucije koje su davale odobrenje za početak tih radova. Da bi ste Vi počeli sa arheološkim istraživanjima bilo gdje u svijetu Vi morate ponuditi validne dokaze da postoje opravdani razlozi zbog kojih to istraživanje treba da započne, ovdje se radilo o tome da je najprije postavljena teza o kojoj je čak napisana i neka knjiga, pa je tek onda počelo iskopavanje što naročito govori da se radi o manipulaciji...

M: Oprostite što Vas prekidam prof. Lovrenović, koliko ja znam, koliko čitam iz vijesti itd. rađene su satelitske i topografske mape, termalne analize i na osnovu toga oni donose svoje hipoteze i navodno potvrđuju, da li Vi znate za to?

L: Ko je radio te snimke, jel se možda Osmanagić popeo na satelit i snimao, od koga je Osmanagić naručio te snimke?

M: To ne znam profesore, bila su takođe georadarska snimanja, takođe ja stvarno ne znam ko je to radio, ali piše da je to bilo, a bili su eksperti iz Njemačke, takođe iz Beograda, iz raznih mjesta, koji su potvrdili mnoge analize, tako čitam, tako piše?

L: Moguće je da je sve to bilo, ja ne mogu o tom segmentu da sudim, međutim poenta je u ovome: tek kada se ponude kompletni validni dokazi, tek kada naučna javnost, koja to može, verifikuju to kao otkriće za koje Osmanagić tvrdi da jeste, u tom slučaju mene će uvjeriti da je on zaista u pravu i meni zaista neće biti teško da kažem Dubravko Lovrenović nije bio u pravu. Do toga moje mišljenje ostaje onako kako sam ga ja Vama iznio.

M: Pa dobro prof. Lovrenović, jako ste bili ljubazni i odgovorili ste mi na mnoga pitanja, imate li još išta da kažete?

L: Nemam ništa da kažem i možda bi najbolji odgovor na sve ovo što sam ja Vama rekao bio da sam sve to skupa prešutio, jer ovo vrijeme koje sam sa Vama razgovarao smatram svojim velikim gubitkom, nemojte to shvatiti kao nešto osobno, ja Vas pozivam kada dođete u Sarajevo da me nazovete i da se nađemo ali ovo zaista jeste izgubljeno vrijeme i ovo vrijeme koje sam ja proveo pričajući sa Vama na najbolji način govori u kakvoj ja zemlji živim.

M: Profesore, meni je žao što Vi to smatrate izgubljenim vremenom, ovo je meni bilo jako dragocjeno vrijeme, ja tragam za istinom ovdje i od Vas očekujem ozbiljne odgovore.

L: Nemojte shvatiti kao ništa osobno, javite se kada dođete u Sarajevo da se slatko smijemo vicevima o piramidi.

M: A imate viceve o piramidi?

L: Koliko god želite.

M: Dobro, biće mi zadovoljstvo, ja se ponovo izvinjavam ako Vam je ovo bio gubitak vremena ja sam Vas zvala zato što ste Vi historičar i zato što ste stručnjak, Vaše ime nalazim po web stranicama itd. i još sam pročitala ovaj komentar da će te se živi spaliti na vrhu piramide ako je ovo stvarno piramida i zato mi je bilo interesantno da Vas nazovem, ali Vi ste sada rekli da to niste nikada rekli.

L: Pa nisam.

M: Dobro, to sam pročitala negdje na web stranici.

L: Dobro, dobro, sve razumijem.

M: Dobro, meni je bilo jako prijatno što smo razgovarali, ako želite da ostanemo u kontaktu mogu Vam dati moj e-mail ili Vi možete meni dati vaš e-mail pa da mi date još više informacija koje imate?

L: Da više ne pričamo o piramidi.

M: A o čemu ćemo pričati?

L: Možemo pričati o Bosanskoj srednjovjekovnoj povijesti koja je jako zanimljiva, možemo pričati recimo o...

M: Biće mi interesantno, studiram historiju.

L: Koja je u zadnje vrijeme jako prisutna, možemo na koncu pričat o bilo čemu drugom.

M: Dobro, nema problema.

L: Bolje to nego da se bavimo ljudskom glupošću.

M: Dobro hoćete da Vam dam e-mail, šta hoćete?

L: Ja ću Vama dati svoj e-mail.

M: A dobro, super.



L: Pišite d...

M: Sačekajte sekundu...

L: Moraćete požuriti mobitel mi je skoro prazan.

M: Dobro.

L: Jel pišete?

M: Da recite.

L: [dublov@bih.net.ba](mailto:dublov@bih.net.ba).

M: Super, dobro profesore, bilo mi je zadovoljstvo.

L: Javite se, biće mi drago.

M : Dobro, meni će još draže biti da Vas upoznam kada dođem konačno da vidim ko je to.

L: I ako nađete kakvu piramidu u Americi molim Vas javite mi da dođem da vidim o čemu se radi.

M: Hoću obavezno.

L: Da onda razvijamo kontakte Bosne i Amerike kao zemlje koje imaju piramide, možda bi onda Amerika Bosnu i Hercegovinu mogla uključiti kao svoju 56. državu, to možda za nas ne bi bilo loše, a za Ameriku baš nisam siguran.

M: Dobro, hoću obavezno, hvala Vam za Vaš intervju i za Vaše vrijeme i oprostite ako sam smetala što ste Vi gubili vrijeme, to mi nije bila namjera.

L: Nemojte se Vi oko toga brinuti, ja sam Vam rekao jasno šta o tome mislim i kako o tome mislim, a meni je inače bilo drago što sam sa Vama razgovarao jer pretpostavljam da će naš kontakt i dalje biti živ.

M: Nadam se.

L: I Vi novinari treba da pišete o ovoj zemlji jer postoji potreba da se o ovoj zemlji piše na objektivan i ozbiljan način.

M: Da ali ja nisam novinar, ja sam student.

L: Pa bez obzira, ako ste student Vi možete uticati na oblikovanje javnoga mišljenja.

M: Tako je, slažem se.

L: Ako ja budem imao sreću da od septembra budem u Čikagu onda će mi biti drago da se vidimo.

M: Čikago je od mene daleko prof. Lovrenović, ja sam u Los Angelesu.

L: Nisam mislio dolaziti u Čikago pješke nego avionom.

M : Dobro.

L: Nisam mislio da idete pješke, ne nikako.

M: Dobro doleću.

L: A pretpostavljam da osim aviona postoje i druga prevozna sredstva u Americi?

M: Do Čikaga ne, najbolje avionom.

L: Samo sam želio reći da postoji mogućnost da od septembra mjececa dođem na studijski boravak u Čikago i to može biti jedna prilika da se vidimo i upoznamo, ništa drugo.

M: Dobro, važi, hvala Vam mnogo opet i čućemo se, slaću Vam kopiju ovog intervjua i da opet ponovim ovaj će intervju biti objavljen, želim da ste upoznati s tim.

L: Gdje će biti objavljen?

M: Biće objavljen na web stranici.

L: Odlično, hvala Vam lijepo i čujemo se opet.

M: Hvala i Vama isto.